

TEZĂUR LITURGIC

8 AUGUST

ACATISTUL SF. CUVIOȘI ZOSIMA ȘI SAVATIE DE LA SOLOVEȚ



MOSCOVA, 2000



Акафист

святым преподобным

Зосиме и Савватию,

Соловецким чудотворцам

Кондак 1

Избраннии уго́дницы Господни и вели́ции чудотворцы, свети́льницы Христо́вы Це́ркве пресвѣтлии, облистáвшии благоче́стия светлосты́ми пусты́ни се́вернаго Поморья, и все́й стране́ Росси́стей сия́ющей вы́ну чудес мно́жеством, преподо́бнии отцы́ на́ши Зоси́мо и Савва́тие, я́ко иму́щие дерзнове́ние ко Го́споду, благоприя́тными сво́ими к Тому́ мо́льбами, от вся́ких на́с бе́д и зóл сохраня́йте, да ра́дуясь зове́м ва́м:

Ра́дуйтеся, преподо́бнии отцы́ на́ши Зоси́мо и Савва́тие.

Икос 1

А́нгели вои́стинну яви́стеся земни́и и челове́цы небесни́и жити́ем ва́шим, преблаже́ннии отцы́

наши Зосимо и Савватие: во плоти бо, яко безплотни, ангельское совершите жителство на земли, вся красоты мира и наслаждения временная яко уметы вменяюще, чистотою же и пощением выну к Богу приближающиеся. Ему же ныне достойно со безплотными предстояще, примите от любви нашей приносимая вам хваления сицева:

Радуйтесь, Единого Бога от всея души своея возлюбивши; радуйтесь, от юности Тому преподобием и правдою послуживши. Радуйтесь, возненавидевши мира сего тленные красоты; радуйтесь, избежавши мудре житейских соблазнов и суеты. Радуйтесь, к деланию заповедей Господних всею любовью прилепившиися; радуйтесь, мира сего и всякаго пристрастия к оному удалившиися. Радуйтесь, иноческое житие богоугождения ради себе предъизбравши; радуйтесь, тесный и прискорбный путь всею душею возлюбивши. Радуйтесь, мудрии взыскатели Христа — Бисера вожделеннаго и драгаго; радуйтесь, люботруднии носители Христова бремене, легкаго и благаго. Радуйтесь, ангелом безплотным во плоти брэнней подражавши;

ра́дуйтеся, на землі́ жи́тельство небе́сное на́м показавшии.

Ра́дуйтеся, преподо́бнии отцы́ на́ши Зо́симо и Савва́тие.

Конда́к 2

Ви́дя себе́, свя́те Савва́тие, ра́ди мно́гих сво́их добродете́льных испра́влений, всю́ду в сопребы́ваниях ино́ческих почита́ема и ублажа́ема, и бе́гая су́етныя ми́ра сего́ сла́вы, взыску́я же ве́чнаго воздая́ния на небесе́х, устремил́ся еси́ ко ото́ку Соловѣ́цкому, да та́мо вта́йне и никѣ́мже ви́димый порабо́таеши невидимому́ и вся́ ви́дящему Бо́гу. Те́мже и улучи́в жела́емое, блаже́нным Ге́рманом к сему́ наставля́емь, ра́достно возопи́л еси́ Бо́гу: Аллилу́ия.

И́кос 2

Ра́зум неукло́нно вперѣ́в от утробы́ ма́терни к Бо́гу, и го́рняя вы́ну му́дрствуя и взыску́я, до́льних же всеце́ло отверга́яся, богому́дре Зо́симо, поревнова́л еси́ жити́ю преподо́бнаго Савва́тия, и во ото́це пу́сте, иде́же се́й богоуго́дне соверши́ по́двиги сво́я, всели́лся еси́, да с ни́м насле́дуеши жи́тельство го́рняго

Иерусалима. Тѣмже во обоихъ восхваляюще пустынножитія рачительство, зовѣмъ вамъ:

Радуйтеся, любве ради Христовы, любовь в себѣ к миру поправшии; радуйтеся, всякую греховную сладость вѣка сего презрѣвшии. Радуйтеся, подобницы Аврааму не точию верою и упованием, но и добровольным от рода своего и дома отеческаго преселением; радуйтеся, пустыни всекрасная и благозлачная насаждения. Радуйтеся, безмолвия тщаливейшии рачителие; радуйтеся, трудных подвигов пустынных искреннии любителие. Радуйтеся, в дѣбрех и горахъ паче, неже в сѣлехъ міра, изволившии приметатися; радуйтеся, в пустыняхъ незаходимыхъ, едины во трудѣхъ и соблюденіи заповедей Господнихъ возлюбившии подвизатися. Радуйтеся, яко злато, искусившиися в горниле пустыннаго озлобленія; радуйтеся, доблественне претерпѣвшии от бесовъ же и от людей многая искушенія. Радуйтеся, пророку Божию Илиі и Крестителю Господню Иоанну нравомъ пустыннолюбия подражателие; радуйтеся, доблему Герману единомысленнии сподвижницы любобезмолвнии купножителие.

Радуйтеся, преподобнии отцы наши Зосимо и Савватіе.

Кондак 3

Силы небесныя, в служение посылаемыя хотящим наследовати спасение, дивно послужиша вам, о двоице боголюбивая. Егда бо насельницы мирстии, стужающе безмолвию твоему, отче Савватие, жити хотяху во острове близ тебе с женами и чады, ангели грозным прещением и наказанием жены рыбаревой, воспятиша сих от начинания богопротивнаго. Тебе же, отче Зосимо, во озимении пребывавшему кроме брашна, ангельским служением преподашася потребная к препитанию. Сего ради Богу, спасающему угодники Своя, поим: Аллилуия.

Икос 3

Имуще оток морской обителищем себе, никимже населяемый, и в нем пребывающе, аки в рай богозданнем, вне мятэжей и волнений житейских, и кроме суетных попечений, благочестно и богоугодно подвизаетесь, о богоблаженнии, во дни и ноци поучающиеся в законе Господни, и на всякий час умом несмущенным и сердцем чистым возносяще усердныя к Богу молитвы и моления. Сего ради радостию вопием вам:

Ра́дуйтеся, в за́коне Го́сподни непоро́чно ходи́ти всегда́ восхоте́вшии; ра́дуйтеся, Го́спода своего́ пред очима́ свои́ма при́сно имевшии. Ра́дуйтеся, стра́хом Го́сподним вся́ пути́ своя́ огражда́вшии; ра́дуйтеся, в трезвении́ умнем все́ житие́ свое́ провожда́вшии. Ра́дуйтеся, вся́ по́мыслы ума́ в послуша́ние Христо́во всеце́ло плени́вшии; ра́дуйтеся, чи́стыя ва́ша сердца́ в жили́ще Свято́му Ду́ху предста́вившии. Ра́дуйтеся, не да́вшии сна́ очима́ во всено́щных Го́сподеви́ предстоя́ниих; ра́дуйтеся, вы́ину претерпева́вшии ско́рби в поуче́нии сме́ртнем и в се́рдечных ко Го́споду воздыха́ниих. Ра́дуйтеся, с и́скреннею любо́вию подвиза́вшиися на славосло́вие Бо́жие и псалмопе́ния; ра́дуйтеся, се́рдцем и уста́ми непреста́нныя возсыла́вшии к Бо́гу моле́ния. Ра́дуйтеся, вну́трь се́рдца своего́ сокрове́нное Ца́рствие Бо́жие обрети́вшии; ра́дуйтеся, восхожде́нию умными́ к небе́сным видения́м восте́кшии.

Ра́дуйтеся, преподо́бнии отцы́ на́ши Зо́симо и Савва́тие.

Кондак 4

Бурю житія сего многомятежнаго безбедно преминуте, отцы преподобнии, и свирепыя волны страстей же и искушений, от мира и плоти и от духов злобы воздвигаемая, не погрузиша и не поколебаша корабля душ ваших, ветрилы молитвы непрестанныя окривяемаго, и нестяжанием облегчаемаго, благодатию же Божиею управляемаго. Темже и достигосте к безмятежному пристанищу живота вечнаго, вопиюще Богу: Аллилуия.

Икос 4

Слышаще и ведающе от писаний Божественных, яко вси подвизавшиися во благочестии, распинаху плоть свою со страстьми и похотьми, благочестномудренно, о преподобнии, сих подвигом последствуяще, подвизаетесь умертвити уды своя сущия на земли, в пощениих, бдениих и во всяких трудех иноческаго житія мужески претерпевающе скорби. Сего ради, яко добля подвижники благочестия, венчаем вы хвалении сицевыми:

Радуйтеся, телеса своя трудами и болезнями воздержания увядившии; радуйтеся, вся плотская мудрования, на дух воюющия, духу

покорившии. Радуйтесь, покаянными слезами пламень страстей угасивши; радуйтесь, в пещи воздержания души своя яко злато очистивши. Радуйтесь, ветхаго человека со страстьми его совлékшиися; радуйтесь, одеждоу безстрастия и славою нетления достойно облékшиися. Радуйтесь, возненавидевши временную греха сладость; радуйтесь, наследовавши на небеси нескончаемую радость. Радуйтесь, прежде смерти, миру и сластем его плоть свою распявши; радуйтесь, прежде воскресения, славу будущия жизни в себе проявивши. Радуйтесь, стезею поста к наследию рая, потеряннаго невоздержанием, путь нам указавши; радуйтесь, в телеси мертвенном и тленном безсмертие и нетление будущего века всем предъявивши.

Радуйтесь, преподобнии отцы наши Зосимо и Савватие.

Кондак 5

Боготечныя и многосветлыя звезды явились есте, преподобнии отцы Зосимо и Савватие, светозарными исправлении заповедей Господних озаряющии души и сердца верных, и преплывающим в нощи греховнаго омрачения

пучи́ну житѣ́йскаго мо́ря, указу́ющи
благонаде́жный пу́ть ко блаже́нному
приста́нищу небе́снаго Ца́рствія. Те́мже
явѣ́вшему вы́, я́ко руководи́тели и наста́вники
ко спасе́нию, благоде́телю Бо́гу поим: Аллилу́ія.

И́кос 5

Ви́девше злоко́зненнии ненави́стницы спасе́ния
челове́ческаго, нечи́стии ду́си тмы́, богоуго́дное
жити́е ва́ше, отцы́ преблаже́ннии,
многообра́зная воздвига́ху на вы́ искуше́ния и
страхова́ния, овогда́ в мы́сли и се́рдце всева́юще
боя́знь и смуще́ние, овогда́ же преобразу́ющесе в
различны́я привиде́ния дѣ́виих зверѣ́й и га́д, с
я́ростию устремля́хуся на вы́, ча́юще отврати́ти
от по́двига богоуго́днаго, и изгна́ти от
пребыва́ния пусты́ннаго. Вы́ же, твёрдою ве́рою
в Бо́га Промы́слителя возмога́я, и ору́жием
моли́твы и воздержа́ния проти́ву враго́в ва́ших
ополча́ющесе, до конца́ победи́сте и низложи́сте
их держа́ву. Сего́ ра́ди, победи́тельную пе́снь
пою́ще, взыва́ем к ва́м:

Ра́дуйтесе, во́ини духо́внии непобеди́мии;
ра́дуйтесе, ору́жницы Христо́вы добропобѣ́днии.
Ра́дуйтесе, подви́жницы, проти́ву ко́зней
лука́ваго му́жески ополчи́вшиися; ра́дуйтесе,

столпи́ крѣпци, от нападѣний вра́жиих не поколеба́вшиися. Ра́дуйтеся, вся́ стрѣлы́ диаволи́ а́ки хвра́стие сокруши́вшии; ра́дуйтеся, вся́ стужѣния́ тогѡ́ и страхованія́ ни во что́же вмени́вшии. Ра́дуйтеся, я́ко во плѡти́ сущѣ, победи́сте враги́ безплѡтныя́ и невидимыя́; ра́дуйтеся, я́ко и во гробѣ́х лежа́ще, низлага́ете вра́жия́ ополчѣния́. Ра́дуйтеся, победоно́сцы́ сла́внии, венча́ннии от небѣснаго́ Венцеда́теля; ра́дуйтеся, спобѡрницы́ до́блии рату́ющим на миродержи́теля́ тмы́ вѣка́ сего́. Ра́дуйтеся, я́ко подвиго́м ва́шим а́нгели удиви́шася; ра́дуйтеся, я́ко о сла́ве ва́шей собо́ри вѣрныхъ́ возвесели́шася.

Ра́дуйтеся, преподо́бнии отцы́ на́ши Зосимо́ и Савва́тие.

Конда́к 6

Проповѣданное́ от а́нгел изволе́ние Бо́жие о населѣ́нии ино́чествующими́ ото́ка Солове́цкаго́ исполнися́ ва́ми, отцы́ преблаже́ннии Зосимо́ и Савва́тие: се́ бо пусты́ня непло́дная и ненаселѣ́нная, по́тами же и слеза́ми ва́шими оби́льно напоѣ́нная, показа́ся я́ко вертогра́д благоцвету́щий и рай словѣ́сный, иде́же ли́цы ино́честии, ва́ми благонаучѣ́ннии, пло́ды

богоугодныя приносяще, поют ангельскую Богу пѣснь: Аллилу́ия.

И́кос 6

Возсия́сте, отцы́ богоно́снии, свѣтом благочѣстия, яко свети́ла богосвѣтлая, светоно́сными луча́ми ва́ших подвиго́в и добродѣтелей просвеща́ющи всю́ду. Отонудуже мы́, грѣшнии и тмо́ю страсте́й помраче́ннии, во свѣте ва́ших богоугодныхъ дея́ний теку́ще ко дню́ свѣта и спасе́ния, восхваля́ем вы́, поюще́ си́це:

Ра́дуйтеся, ученицы́ Христо́вы благопослу́шнии; ра́дуйтеся, Влады́ки своего́ раби́ блази́и и ве́рнии. Ра́дуйтеся, трудолю́бнейшии виногра́да Христо́ва де́лателие; ра́дуйтеся, тща́ливейшии за́поведей Христо́вых исполните́лие. Ра́дуйтеся, и́гу Христо́ва смире́ния и крото́сти благопоко́рне ра́мо свое́ подклони́вшии; ра́дуйтеся, во слѣд Христа́ Го́спода, учившаго о нищете́, усер́дно в нищете́ и нестяжа́нии послѣдовавшии. Ра́дуйтеся, по словеси́ Го́спода, прешѣдшии пу́ть вре́меннаго жити́я сего́, стезя́ми приско́рбными и те́сными; ра́дуйтеся, а́ки дожде́м, измы́вшии ду́ши своя́ то́ками слѣзными. Ра́дуйтеся, красне́йшему ду́ш Жениху́ красоту́ де́вства своего́ сохрани́вшии;

ра́дуйтеся, во всяко́й свѣты́ни, все́ми до́брыми де́лы То́му благоуто́дившии. Ра́дуйтеся, Го́спода свое́го просла́вившии в душа́х ва́ших и телесе́х; ра́дуйтеся, от Го́спода по досто́янию просла́вленнии на землі́ и на небесе́х.

Ра́дуйтеся, преподо́бнии отцы́ на́ши Зо́симо и Савва́тие.

Конда́к 7

Хотя́й спасти́ ва́ми мно́гих, Преми́лосе́рдый Бо́г яви́ ва́с бы́ти не то́чию наста́вники со́нма ино́чествующих, но́ якоже боговещáнныя пропове́дники, возвесті́вшыя і́мя Бо́жие в страна́х Ла́пландии. Лю́дие бо, во о́них ме́стех обита́ющии, и неве́девшии до́толе Бо́га, но прилежа́вшии весе́ма́ идо́лопокло́нению и нече́стию, во свѣ́тлости ва́шего, о преподо́бнии, жити́я, зна́мений же и чуде́с, узрѣ́ша пе́рвую зарю́ спасі́тельнаго боговѣ́дения и благоче́стия, и от ва́с научи́шася воспева́ти і́стинному Бо́гу: Аллилу́ия.

И́кос 7

Ді́вно и пресла́вно соверши́вше пу́ть свое́го спасе́ния, чу́дную же и боголе́пную основа́вше оби́тель во спасе́ние ино́чествующим, блаже́нную восприя́сте живота́ свое́го кончи́ну,

приснопамятнии отцы наши, Зосимо и Савватие. Обаче, и по смерти вашей, присно живи суще, нас, чад своих, никогдаже оставляете, не духом точию нам присно спребывая, но и мощи своя цельбоносныя нам предавше, яко сокровище безценное. Сего ради с радостию ублажаем вы, зовуще:

Радуйтесь, добрым подвигом во всем житии своем подвизавшиися; радуйтесь, славою и честью от Владыки своего Христа увенчавшиися. Радуйтесь, яко привременно потрудившеся, в вечный покой внидете; радуйтесь, яко тесным шествовавше путем, к блаженству Царства небеснаго достигнете. Радуйтесь, аще и не единокупно, но в равных подвигах подвизавшиися на земли; радуйтесь, за равноподвижное житие, радостию и веселием вкупе наслаждающися на небеси. Радуйтесь, во отце пусте, яко град, обитель иноком основавшии; радуйтесь, сонмы иноков о Христе Боже во оной собравшии. Радуйтесь, стражи стаду своему приснободреннии, и по днех временныя жизни от дел благотворений не почивающии; радуйтесь, сынове Царствия, на небесех живущии и земных не оставляющии. Радуйтесь, духом вашим горе со Ангелы

святы́ми, и до́ле с на́ми грѣшными прѣсно пребыва́ющи; ра́дуйтеся, от честныхъ мо́щей ва́ших стру́й ми́лости на всѣхъ источа́ющи.

Ра́дуйтеся, преподо́бнии отцы́ на́ши Зо́симо и Савва́тие.

Конда́к 8

Стра́нную и пречу́дную, ве́лию же и прекра́сную, узрѣвши на возду́се явля́ющуюся це́рковь, все́ же ме́сто о́но, на нёмже имяше возградѣ́тися оби́тель ино́ков, ви́дя неизрече́нным свѣ́том осия́ваемо, ужа́сом испо́лнился еси́, о́тче Зо́симо, от предѣ́внаго видѣ́ния. Оба́че, Бо́жие во о́ном откровѣ́ние поразуме́в, на созида́ние оби́тели тебе́ поощря́ющее, купно́ же и гряду́щую сла́ву ме́ста сего́ прозря́, умилѣ́нным се́рдцем и усты́ воспѣ́л еси́ Бо́гу: Аллилу́ия.

И́кос 8

Вси́ право́вернии росси́йстии лю́дие, прославля́я ва́ше свято́е и равноа́нгельное жити́е, во вся́ких ну́ждах и ско́рбех притека́ют к ва́шей по́мощи и заступле́нию, отцы́ досточу́днии: дана́ бо е́сть ва́м от Бо́га благода́ть, е́же моли́тися за ны́, избавля́ти же и спаса́ти от вся́ких бе́д и золъ притека́ющия к ра́кам честныхъ мо́щей ва́ших, и

на всяком мѣсте призывающія святое ваше имя. Тѣмже, исповѣдающе чудная ваша благодеянія, благодарственная восписуем вам, зовуще:

Радуйтеся, источницы Божественных дарованій неисчерпаеми; радуйтеся, милованія и любви к людем сосуди неизживаеми. Радуйтеся, яко кадило благовонное, о мире молитвы к Богу возносящии; радуйтеся, немолчными вашими ходатайствы всякое благословение от десницы Божия на ны низводящии. Радуйтеся, сущим в скорбех и нуждах известнии помощницы; радуйтеся, в обстояниих и напастех скории пособницы. Радуйтеся, в недугех целители, и в бури страждущим благонадежныи кормчи и избавители; радуйтеся, во всяких бедах и искушениих теплии предстатели и утешители. Радуйтеся, верному Императору нашему благочестно чтущему вас, на сопротивныя споборницы; радуйтеся, всея земли Россійския избраннии молебницы и заступницы. Радуйтеся, на земли и на мори чудеса преславная содевающии; радуйтеся, во вся концы призывающим вы, скорую помощь незавѣстно простирающии.

Ра́дуйтеся, преподо́бнии отцы́ на́ши Зо́симо и Савва́тие.

Конда́к 9

Все́ми богокра́сными ле́потами добродете́лей украси́в себе́, прехва́льне Зо́симо, наипа́че яви́лся еси́ красне́йший душе́ю же и те́лом, досто́йно пома́зався священ́ства божество́нною ма́стию. Те́мже, егда́ во святе́м хра́ме соверша́л еси́ пред престо́лом Госпо́дним пе́рвую Божество́нную службу́, видеша́ вси́ лице́ твоё, облиста́нное све́том благода́ти, я́ко лице́ а́нгелово; ве́сь же хра́м, во изве́стное свиде́тельство досто́инства твоего́, испо́лнися ве́лия благоуха́ния. Сего́ ра́ди вси́, благода́ряще Бо́га о своём па́стыре, ра́достным се́рдцем зыва́ху: Аллилу́ия.

И́кос 9

Витийственными добровещаньми несть возмóжно по достоя́нию воспéти и просла́вити мно́гая и неисче́тная, ве́лия же и пресла́вная, и вся́кое разу́мение земно́е превосходя́щая, соверша́емая ва́ми, отцы́ преподо́бнии, на вся́кое вре́мя чудотворéния. Оба́че, да не яви́мся чрез немотствова́ние подо́бни рабу́, сокрыв́шему сокрови́ще своего́ Влады́ки, от у́ст, а́ще и не

обучённых и слова премудрости отнюд не имущих, любовью же точно и благодарением движимых, дерзаем простирати песнь благодарения в память и прославление чудес ваших, зовуще сице:

Радуйтесь, чудотворцы великоименитии и благославнии; радуйтесь, душ и телес врачеве немздоприёмнии. Радуйтесь, очеса слепых благодатию Божиею просвещающие; радуйтесь, немотою связанныя уста ко благоглаголаню разрешающие. Радуйтесь, ослабленных удесы исправляющие неможение; радуйтесь, хромым дарующии правохождение. Радуйтесь, плененных предстательством своим от уз и пленения свободяющие; радуйтесь, мертвых силою Божиею, вашим же умолением воскрешающие. Радуйтесь, от обладания и мучительства бесовскаго одержимым, подающие свободение; радуйтесь, во всяких страстех и недужех совершающие дивное поможение и исцеление.

Радуйтесь, преподобнии отцы наши Зосимо и Савватие.

Кондак 10

Спасения подвиг добре совершив, жития же сего временнаго отрешаяся и отходя к животу вечному и блаженному, Зосимо богоблаженне, утешал еси ученики твоя, глаголя, яко разлучаяся с ними телесне, неотступен будеши от них и обители твоея твоим духом. Отонудуже и самими делы слово твое исполняющъ являешися, не точию невидимо соприсутствуя нам и назирая вся, но и видимо многажды, вкупе со блаженным Савватием, являеся во время благопотребно призывающим вас в помощь и вопиющим Богу: Аллилуия.

Икос 10

Стена неборимая и покров твердый, спасения забрало и оружие победы быша нам, отцы преподобнии, теплыя ваши к Богу молитвы, в день брани оныя лютыя, егда, по грехом и беззаконием нашим, врази крепции и бранноискуснии со огнем и мечем нападоша на ны в достоянии вашем, во еже сокрушити святыни ваша, и положити я в разорение и попрание, духовная же чада ваша победити и погубити смертию безгодною; обаче, никоеже зло возмогше сотворити, сами наипаче тии

испóлнишася студá и безчéстия, упова́ющи же на по́мощь ва́шу препоя́сашася ра́достью и весéлием о своéм спасéнии. Благодаря́ще у́бо о сём Бо́га, исповéдуем кúпно ва́ше ходáтайство и заступлéние, и вопи́ем вам тéпле из глубины́ души́:

Ра́дуйтеся, па́стырие дóбрии, от врагóв губительных ста́до своé защища́ющи; ра́дуйтеся, я́ко орли́ под крило́ма сво́има птенцы́ своя́ покрыва́ющи. Ра́дуйтеся, покрóвом моли́тв своих в дeнь брани́ нас осени́вши; ра́дуйтеся, гнeв Бо́жий, пра́ведно на ны́ дви́жимый, ходáтайством сво́им утоли́вши. Ра́дуйтеся, не да́вши своего́ достоя́ния в попрáние и расхищéние; ра́дуйтеся, па́че наде́жды сохрани́вши е́ от о́гненного запалéния. Ра́дуйтеся, упова́ющыя на вы́ от губительства́ смeртнаго свободи́вши; ра́дуйтеся, от рáны и язвы, от у́з и пленéния дивно́ тeх сохрани́вши. Ра́дуйтеся, врагóв горды́ню и дерзнове́ние обрати́вши в стúд им и безчéстие; ра́дуйтеся, нас, жи́тельствующыя в обители́ ва́шей, неискусобра́нных и безору́жных, оде́явши в ра́дость и весéлие. Ра́дуйтеся, ве́ры и благочéстия отéческаго неусы́пнии

охранители; радуйтесь, за Царя и Отечество явльшиися и по смерти мужественнии воители.

Радуйтесь, преподобнии отцы наши Зосимо и Савватие.

Кондак 11

Песни хвалёбныя и моления всеумилённая приносяще, долготу же путную и опасности моря ни во чтоже вменяюще, притекают к цельбоносным мощем вашим царие и князи, святители и вельможи, богати и убози, ближнии и дальнии, всяк возраст и пол, и всякое верных совокупление, и яко от неистоцимаго источника, по коегождо своей потребе, приемлюще обильная врачевания душевная же и телесная, прославляют и величают Бога, таковую благодать вам даровавшаго, поюще: Аллилуия.

Икос 11

Светом Божественная благодати, в недрах земли, в предивных знамениях и чудесах, от первых дней упокоения возблиставшыя ваша мощи, достождно и праведно лица иночестии, от многолетнаго покровения изнесше, поставиша со благоговением на свещнице церковнем, во храме, имени вашему созданнем,

благочестіем великаго и святаго подражателя
ваших подвигов, исповедника и мученика,
святителя и первопрестольника Россійскаго
Филиппа. И мы ныне, благочестно о славе вашей
веселящися, обстояще честныя раки мощей
ваших и любезно тыя облобызающе, велегласно
зовем вам:

Радуйтесь, светильницы пресветлии, на
свещнице церковнем преславно поставленнии;
радуйтесь, кивоти честнии, не каменіем и
златом, но благодати дарованьми украшеннии.
Радуйтесь, яко две звезды, озаряющии тму
полунощную; радуйтесь, яко два столпа, в
пределех севернаго Поморія утверждающии
веру православную. Радуйтесь, источицы
райстии, моря чудес изливающии; радуйтесь,
бисеріе дражайшии, Церковь Христоу
украшающии. Радуйтесь, благочестия и
добродетели светлейшая зерцала; радуйтесь,
Церкви и Отечества необоримая забрала.
Радуйтесь, райскаго исполненія крини
благовоннейшии; радуйтесь, лозы
Божественныя розги благоплодейшыя.
Радуйтесь, отцы всеблаженнии, прославляемии
горе от Бога и ангел, и доле ублажаемии от

человѣк; радуйтесѧ, яко радость ва́ша, святая и совершенная, пребывает во вѣк.

Радуйтесѧ, преподобнии отцы́ наши Зосимо и Савватие.

Кондак 12

Благодать Свою́ Божественную, в телесѣх ва́ших обитающую, яви́ иногда́ преблагий Бо́г благоговейному иноку Ио́сифу во образе двѣх столповъ огнезрачных, от земли́ до небес над гробами ва́шими возносящихся и сияющих свѣтом неизреченным: воистинну бо вы́ есте, отцы́ преподобнии, духовнии светозарнии столпы́, свѣтлостію высо́ких добродѣтелей и свѣтом богознанія, знаменій же и чудес, озаривши пресвѣтло духовную тму́ в странахъ полунощных. Сего́ ради Бо́гу, прославляющему святы́я Своя́, поим: Аллилу́ия.

Икос 12

Поюще в пѣснях подвиги и труды́ ва́шего богоугоднаго житія́, пресла́вная же содея́нная и содева́емая во всякомъ роде́ благотворенія́ и чудотворенія́ восхваляюще и прославляюще, недоумеем, отцы́ досточуднии, како́ вас по долгу́ возъимену́ем: мно́гия бо сѹть ва́ша добродѣтели и дарованія́, сего́ ради мно́гая приличествуют

ва́м и именовáния. Обáче, во мно́гих ма́лыми удовля́ющеся, сиа́ ва́м с любóвию воспису́ем:

Ра́дуйтеся, а́нгели земни́и, я́ко а́нгельским жи́тельством на землі́ пожи́сте; ра́дуйтеся, челове́цы небéснии, я́ко земнорóдни сýще, возненавидесте земна́я, небéсная же возлюбите́. Ра́дуйтеся, по́стницы терпели́вейшии, в при́сном пощéнии все́ жити́е свое́ проводивши́и; ра́дуйтеся, пусты́нницы достохва́льнии, в пусты́нях незаходи́мых Го́сподеви послуживши́и. Ра́дуйтеся, учи́телие и наста́вницы, руководи́щи свои́ми де́лы на пути́ спасéния; ра́дуйтеся, вожди́ духо́внии, мно́гих ду́ши возводи́щи в небéсная селéния. Ра́дуйтеся, мучени́ком еди́нонравни́и, я́ко му́жески бра́вшиися со страстьми́; ра́дуйтеся, апо́столом подража́телие, просвети́вши тму́ неве́рия боговéдения светлостью́ми. Ра́дуйтеся, проро́ком подо́бницы, та́йных и б́удущих провéдением и проречéнием; ра́дуйтеся, все́м святы́м еди́ночестни́и, по́двигов ради́ и богоугождéния. Ра́дуйтеся, та́инницы благода́ти и чудéс совершители́е предивни́и; ра́дуйтеся, гра́ждане небéснии и дру́зи Бо́гу и святы́м Его́ при́снии.

Ра́дуйтеся, преподо́бнии отцы́ на́ши Зо́симо и Савва́тие.

Конда́к 13

О, преподо́бнии отцы́ на́ши Зо́симо и Савва́тие! Приимите благоутро́бно от нас, смире́нных и недостойных, сия́ возно́симая ва́м хвале́ния, и благоприя́тными ва́шими к Бо́гу мо́льбами оградите ны́ от вся́кия бе́ды и напа́сти, от недуга́ и гла́да, от огня́ и меча́, и наше́ствия иноплеме́нных. Наипа́че же сохраните ны́ ва́шим заступле́нием кре́пким от враго́в невидимых, и́щущих ны́ погуби́ти, да избе́вше их многоко́зненных се́тей, пра́ведно и богоу́годно поживе́м в ны́нешнем ве́це, и сподо́бимся в небе́сном Ца́рствии ку́пно с ва́ми воспева́ти Христу́ Бо́гу: Аллилу́ия.

Этот конда́к чита́ется трижды, затем и́кос 1-й и конда́к 1-й.

Моли́тва

О, преподо́бнии и богоно́снии отцы́ на́ши Зо́симо и Савва́тие, земнии а́нгели и небе́снии челове́цы, бли́жнии дру́зи Христо́вы и уго́дницы Бо́жии, сла́ва и украше́ние ва́шей оби́тели, необори́мая стена́ и вели́кое заступле́ние се́верных страны́, и всего́ правосла́вного

отечества нашего. Мы, недостойнии и многогрешнии, с благоговейною любовью припадаем к ракам честных мощей ваших, и духом сокрушенным и смиренным прилежно молим вы: молитесь непрестанно Благоутробнаго Владыку и Господа нашего Иисуса Христа, яко имущии к Немю дерзновение велие, да не отступит от нас Его вседействующая благодать, покров же и заступление Пресвятыя Владычицы нашея Богородицы от места сего, и да не оскудеют никогдаже истиннии ревнители ангельскаго жития во святей обители сей, идеже вы, богоноснии отцы и начальницы, безмерными трудами и пощениями, токами слезными и всеночными бдениями, непрестанными молитвами и моленьми положите начало иноческому житию. Ей, угодницы святии, молитвенницы к Богу благоприятнейшии, теплыми вашими к Немю мольбами оградите и сохраните ны и святое селение сие ваше от труса, потопа, огня и меча, нашествия иноплемённых и смертоносныя язвы, от вражды и всяких нестроений, от всякия беды и скорби и от всякаго зла, да выину на месте сем, в мире и безмолвии, благочестно славится пресвятое имя Господа и Бога, и обретают

вѣчное спасѣние ищущи Егѡ. О, преблаженнии отцы наши Зосимо и Савватие! Услышите ны, грешныя, во святей обители вашей и под кровом вашего защищения недостойно жительствующия, и благомощными вашими к Богу ходатайствы испросите душам нашим грехов оставление, жития исправление и вѣчных благ восприятие в небеснем Царствии; всем же верующим, иже на всяком месте и во всякой нужде призывают вас в помощь и заступление, и иже с благоговейною любовью притекают во обитель вашу, не престаните изливати всякую благодать и милость, сохраняя их от всякия сопротивныя силы, от всякия напасти и от всякаго злаго обстояния и подавая им вся потребная к душевной и телесней пользе. Наипаче же молитѣ премилосердаго Бога: страждущую страну Россійскую от лютых безбожников и власти их да свободит и да возставит престол православных царей; верных рабов Егѡ, в скорби и печали день и ночь вопиющих к Немѹ, многоболѣзный вопль да услышит и да изведет от погѣбели живот наш, Церковь же Свою святую да утвердит и укрепит, и все наше православное отечество в мире и тишинѣ, в любви и единомыслии, в правове́рии

и благочестии да сохранит, и соблюдет во веки.
Аминь.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НОВОЕ
НЕБО**